

雲笈七籤卷之七

學七

雲笈七籤卷之七

三洞經教部

本文

說三元八會六書之法

道門大論曰一者陰陽初分有三元五德八會之氣以成飛天之書後撰為八龍雲篆明光之章陸先生解三才謂之三元三元既立五行成具以五行為五位三五和合謂之八會為衆書之文又有八龍雲篆明光之章自然飛玄之氣結空成文字方一文肇於諸天之內生立一切也按真誥紫微夫人說三元八會之書建文章之祖八龍雲篆是根宗所起有書之始也又云八會是三才五行形在既判之後亦書云靈寶亦書五篇真文出於元始之先即此而論三元應非三才五德應非五行也此正應是三寶丈人之三氣三氣自有五德耳故九天生神章云天地萬化自非三元所育九氣所導莫能生也又曰三氣為天地之尊九氣為萬物之根故知此三元

在天地未開三才未生之前也宋法師解八會祇是三氣五德三元者一曰混洞太無元高上玉皇之氣二曰赤混太無元無上玉虛之氣三曰冥寂玄通元無上玉虛之氣五德者即三元所有三五會即陰陽和陰有少陰太陰陽有少陽太陽就和中之和為五德也篆者撰也撰集雲書謂之雲篆此即三元八會之文八龍雲篆之章皆是天書三元八會之例是也雲篆明光則五符五勝之例是也八會本文凡一千一百九字其篇真文合六百六十八字是三才之元根生立天地開化人神萬物之由故云有天道地道神道人道此之謂也玉訣云修用此法五篇皆分字數各有四條

一者主召九天上帝校神仙圖錄求仙致真之法二者主召天宿星宮正天分度保國寧民之道三者攝制鄴都六天之氣四者勅命水帝制召龍鳥也其諸天內音一天有八字三十二天合二百五十六字論諸天度數期會大聖真仙名諱位號所治官府臺城處所

神仙變化并降品次衆魔種類八鬼生死轉輪因緣其十三字是五方元精名號服御求仙鍊神化形白日騰空之法餘一百二十二字闕元音解

二者演八會為龍鳳之文謂之龍書此下皆玄聖所述以寫天文也

三者軒轅之時倉頡傍龍鳳之勢採鳥跡為古文以代結繩即古體也

四者周時史籀變古文為大篆

五者秦時程邈變大篆為小篆

六者秦後盱陽變小篆為隸書又云漢謂隸書曰佐書或言程邈獄中所造出於徒隸故以隸為名此即為六書也

雲篆

又有雲篆明光之章為順形梵書文別為六十四種播于三十六天今經書相傳皆以隸字解天書相雜而行也

八體六書六文

一曰大篆二曰小篆三曰刻符四曰蟲書五曰篆印六曰署書七曰殳書八曰隸書玉莽

時使司徒甄豐校定文字復有六書一曰古文孔子壁中書二曰奇字古文異書三曰篆書四曰佐書即隸書五曰繆篆所以摹印六曰鳥篆翻言也倉頡始書已應有筆詩云形管則是筆也而言象恬造筆者蓋恬為秦將三世有名制削筆精能獨擅名也漢和帝時蔡倫始造紙爾前唯書簡牒牒者詮牒語事也簡者在簡而不繁也但知本是天書金簡餘地書已下八體六文皆從真出外學者自更詳之又未知何時書於此經在紙作卷今謂劫初已自有筆太真所書何言無也及以八體六文等耶以天專造化具一切法也後人承用自有前後耳六文一曰象形日月是也二曰指事上下是也三曰形聲河海是也四曰象意或信是也五曰轉注考老是也六曰假借令長是也

### 符字

一切萬物莫不以精氣為用故二儀三景皆以精氣行乎其中萬物既有亦以精氣行乎其中也是則五行六物莫不有精氣者也

道之精氣布之簡墨會物之精氣以却邪偽輔助正真召會群靈制御生死保持劫運安鎮五方然此符本於結空太真仰寫天文分置方位區別圖象符書之異符者通取雲物星辰之勢書者別折首句鈐量之旨圖者畫取靈變之狀然符中有書參似圖象書中有圖形聲並用故有八體六文更相發顯

### 八顯

八顯者一曰天書八會是也二曰神書雲篆是也三曰地書龍鳳之象也四曰內書龜龍魚鳥所吐者也五曰外書鱗甲毛羽所載也六曰鬼書雜體微昧非人所解者也七曰中夏書草藝雲篆是也八曰戎夷書類於蜺蟲者也此六文八體或今字同古或古字同今符彩交加共成一法合為一用故同異無定也此依宋法師所說未見正文而三洞經中符有字者如古文高書中有古字與今同者耳

### 玉字訣

太上道君於南丹洞陽上館為學士玉龍賜

說此靈文玉字之訣但未知定是何世所注學者尋之又說諸修行符籙五方思存穰災等法然正是解訣八會之文而就本文理中復明理如解真文中更明感通之理定志經又云出思微之義事中復有事如玉訣中復明傳經及盟授威儀之事然諸經中凡有解訣皆通謂之玉訣也

### 皇文帝書

三皇經云皇文帝書皆出自然虛無空中結氣成字無祖無先無窮無極隨運隱見綿綿常存

### 天書

諸天內音經云忽有天書字方一文自然見空其上文彩煥爛八角垂芒精光亂眼不可得者天真皇人曰斯文專妙不聲於常是故開大有之始而閉天光明以寶其道而尊其文其字宛與非凡書之體蓋貴其妙象而隱其至真也

### 龍章

靈寶經云赤明開圖運度自然元始安鎮敷

落五篇赤書玉字八威龍文係制劫運使天長存此之龍章也

鳳文

紫鳳赤書經云此經舊文藏在太上六合紫房之內有六頭眸子巨獸夾牆玉童玉女侍衛鳳文

玉牒金書

三元布經皆刻金丹之書或以自然雲錦之囊封以三元寶神之章藏於九天之上大有之宮謂之玉牒金書又云以紫玉為簡生金為文編以金縷纏以青絲太上天真科云玉牒金書七寶為簡又名紫簡

石字

本行經云道言昔禪黎世界隊玉有女字結音生仍不言年至十四王怪之焉乃棄女於南浮長桑之阿空山之中女行山周巾忽與神人會於丹陵之舍栢林之下神執結音右手題赤石之上語結音曰汝雖不能言可憶此也天為其威感其疾遣朱宮靈童下教結音治身之術授其赤書八字結音於是能言

靈寶玉訣經云道告阿丘曾曰汝前生與南極尊神同在禪黎世界於丹陵之舍栢林之下同發道意爾時南極姓皇字度明執汝右手俱題赤石以記姓名南官即書汝筆跡題於南軒今猶尚在石字亦存汝憶之不丘曾

心悟舉目即見南極所主南壁刻書云太甲歲七月一日皇度明王阿丘曾同於丹陵栢林下發願合二十三字字甚分明

題素

五符經云五符一通書以南和之縉南和赤色縉也封以金英之函印以玄都之章付震水洞玄之君仙公請問經云道德上下經及洞真玄經三皇天文上清衆篇詠等皆是太上所撰而為文書於南和之縉故曰題素也

玉字

內音玉字經云天真皇人曰諸天內音自然玉字字方一文自然而見空玄之上八角垂芒精光亂眼靈書八會字無正形其趣宛奧難可尋詳皆諸天之中大梵隱語結飛玄之氣合和五方之音生於元始之上出於空洞

之中隨運開度普成天地之功

天尊命天真皇人注解其正音使皇道清暢

澤被十方皇人不敢違命按筆注解之曰形

魂頻喪率我所見聊注其文五合之義其道

足以開度天人也和合五方無量之音以成

諸天內音故曰五合之義也

文生東

太平經云文者生於東明於南故天文生東北故書出東北而天見其象虎有文章家在寅龍有文章家在辰文者生於東盛於南是

知真文初出在東北也

玉錄

玉清隱書有帝簡金書玄玉錄籍可以傳玄羽玉經也又云自非帝圖玉錄者不得聞見上皇玉慧玉清之隱書金玄隱玄之羽經也

玉篇

衆篇序云元始命太真按筆玉妃拂逆鑄金為簡訓書玉篇五老掌籙秘於九靈仙都之

官雲縹而授葛仙公之經也

玉札

玉札

金根經云太上大道君以大洞真經付上相青童君掌錄於東華青宮使傳後聖應為真人者此金簡玉札出自太上靈都之宮刻玉為之

丹書墨錄

太真科云丹簡者乃朱漆之簡明火主陽也墨錄者以墨書文明水主陰也人學長生遵之不死故名丹簡墨錄秘不妄傳

玉策

天皇手執飛仙玉策人皇手執上皇保命玉策地皇手執元皇定錄玉策

福連之書

三十九章經曰太上有瓊羽之門合延為胎命之王玄一為三氣之尊元老為上帝之賓並扶兆身神臺列名於福連之簡又曰太上金簡玉札為福連之書

琅玕瓊文

飛行羽經云金書玉錄乃琅玕瓊文也

白銀之編

金房度命經云太常雷神都宮中有金房度

命四年之訣皆鑄金為簡刻白銀之編紫筆書編也

赤書

玉訣經云元始赤書五篇真文置以五帝導以陰陽轉輪九天之紐運明五星之光也

火鍊真文

本相經曰吾昔赤明元年與高上大聖玉帝於此土中鍊其真文以火瑩發字形爾時真文火漏餘處氣生化為七寶林是以枝葉成紫書金地銀鑲玉文其中及諸龍禽猛獸一切神蟲常食林露真氣入身命皆得長壽三千萬劫當終之後皆轉化為飛仙從道不輟亦得正真無為之道

金壺墨汁

聖紀云浮提國獻善書二人乍老乍少隱形則出影聞聲則藏形時出金壺四寸上有五龍之檢封以青泥壺中有黑汁若淳漆灑木石皆成篆隸科斗之字記造化人倫之始老君撰道經垂十萬言皆寫以玉牒編以金繩貯以玉函及金壺汁蓋浮提二人乃欲剖心

瀝血以代墨焉

瓊札

玉清隱書金虎符云鬱儀亦文招日同輿結璘黃章與月共居上清消魔經啓洞門於希林尋靈跡於丹穴發元天之朱價望上清之瓊札玄書既刻於玉章絳名始刊於靈闕四遇三元於玄宮六造五老於靈室

紫字

八素經云八素真經玄文生於太空之內見於西龜之山玄圃之上積石之陰八素高玄羽章靈文鬱乎洞標紫字煥乎瓊林神光流輝於九元金音虛朗於紫天文威煥赫氣布紫庭衆真晏禮稱慶上清

自然之字

玉帝七聖玄記云爾乃迴天九霄白簡青錄上聖帝君受於九空結飛玄紫氣自然之字玄記後學得道之名靈音韻合玉朗稟具或以字體或以隱音上下四會皆表玄名空生刻書廣靈之堂舊文有十萬玉言字無正類韻無正音自非上聖莫能意通積七千年而

後崑崙之室北洞之源字方一丈文蔚煥爛  
四合垂芒虛生眩暎若存若亡流光紫氣拂  
其穢黃金治鍊瑩其文遂經累劫字體鮮明  
至上皇元年九月十七日七聖齊靈清齋長  
官金青盟天貽誓告靈奉受靈文高上解其  
曲滯七聖通其妙音記為迴天九霄得道之  
篇刻以白銀之簡結以飛青之文藏於雲錦  
之囊封以啓命之章付於五老仙都左仙公  
掌錄瓊宮也

四會成字

○ 王帝七聖玄記云七聖玄記迴天上文或以  
韻合或以支類相參或上下四會以成字音  
或標其正諱或單復相兼皆出玄古空洞之  
中高真撰集以明靈文後學之人若有玄名  
者得見此文音空揀初角名四司所保五帝  
記名也

琅簡藥書

八素經云西華宮有琅簡藥書當為真人者  
乃得此文

石頭

三洞珠囊云西王母以上皇元年七月於南  
浮洞室下教以授清虛真人王君傳於夏禹  
禹封文於南浮洞室石碣之中碣亦有作此  
碩者故五符云九天靈書猶封於石碩是也  
今檢諸字類無此碩字也王訣下云五老真  
文封題玉碣亦其例也孔靈符會稽記云會  
稽山南有宛委山其上有石俗呼為石黃壁  
立于雲累梯然後至焉昔禹治洪水厥功未  
就齋於此山發石簣得金簡字以知山河體  
勢於是疏導百川各盡其宜也

雲笈七籤卷之七



正一六清微弟子 道教學術

雲笈七籤卷之八

李

三洞經教部

經釋

釋三十九章經

大洞真經云高上虛皇道君而下三十九道  
君各著經一章故曰三十九章經乃大洞之  
首也

第一章

高上虛皇君曰元氣生於九天之上名曰辟  
非辟非之煙下入人之身而為明梁之氣居  
人五藏之中處乎心華之下此至氣之所在  
長煙之所託能知辟非之由者乃得領祖太  
無領祖太無者盡體虛玄之大冠道素之標  
矣益元羽童乃人鼻之神也衆風亂入人鼻  
之氣也四清撫闢乃鼻下口上之間也當令  
鼻氣閉閑又當數加手按讀此篇捻鼻間乃  
高上之正座天嶽之混氣氣之來也解百結  
鼻神翩翩列坐綠室綠室者脣上入中之際  
也是以帝一上景攝煙連衆長契虛運及華